

Statuti i Fondacionit të KSNK-së

Parathënie

Ky Statut është aprovuar në formën e vet të parë nga Bordi i ish-Komitetit të Standardeve Ndërkombëtare të Kontabilitetit (KSNK) në mars 2000 dhe nga anëtarët e KSNK-së në takimin e mbajtur në Edinburg më 24 maj 2000.

Në takimin e muajit dhjetor 1999, Bordi i KSNK-së kishte caktuar një Komitet Emërues për të përzgjedhur Administratorët e parë të Besuar. Administratorët e Besuar u emëruan më 22 maj 2000 dhe morën detyrën më 24 maj 2000 pas aprovimit të Statutit.

Në kuadër të kryerjes së detyrave të tyre sipas Statutit, Administratorët e themeluan Fondacionin e Komitetit të Standardeve Ndërkombëtare të Kontabilitetit më 6 shkurt 2001. Si pasojë e një rezolute të Administratorëve të Besuar, Pjesa C e Statutit të ndryshuar dhe të aprovuar më 24 maj 2000 pushoi së qeni në fuqi.

Pas vendimit të Administratorëve të Besuar për të krijuar Komitetin Ndërkombëtar të Interpretimeve për Raportimin Financiar dhe pas konsultimeve publike, Statuti u rishikua më 5 mars 2002. Pas kësaj, Administratorët e Besuar bënë shtesa dhe ndryshime në Statut, që hynë në fuqi më 8 korrik 2002, për të pasqyruar ndryshimet që kishin ndodhur qysh prej themelimit të Fondacionit të KSNK-së.

Statuti u kërkon Administratorëve të Besuar ta rishikojnë Statutin çdo pesë vjet. Administratorët e Besuar e nisën rishikimin e parë në nëntor 2003 dhe, pas konsultimeve të gjera, e përfundoi këtë rishikim në qershor 2005. Ky version pasqyron ndryshimet e miratuara nga Administratorët e Besuar më 21 qershor 2005, që hynë në fuqi më 1 korrik 2005.

Statuti i Fondacionit të KSNK-së

(aprovuar nga anëtarët e KSNK-së në një takim në Edinburg të Skocisë më 24 maj 2000 dhe i ndryshuar nga Administratorët e Besuar të Fondacionit të KSNK-së më 5 mars dhe 8 korrik 2002 dhe 21 qershor 2005)

Statuti përbëhet nga Pjesa A dhe Pjesa B. Pjesa A ka të bëjë me emërtimin dhe objektivat e organizatës dhe anëtarësimin dhe emërimin e Administratorëve të Besuar. Pjesa B ka dispozita të cilat kanë hyrë në fuqi kur Administratorët e Besuar themeluan Fondacionin e Komitetit të Standardeve Ndërkombëtare të Kontabilitetit më 6 shkurt 2001, pas një Rezolute të Administratorëve të Besuar. Në përputhje me vendimin e Administratorëve të Besuar, Pjesa C e Statutit, e aprovuar më 24 maj 2000, nuk është më në fuqi.

Pjesa A

Emërtimi dhe objektivat

- 1 Emri i organizatës është “Fondacioni i Komitetit të Standardeve Ndërkombëtare të Kontabilitetit” (shkurt, “Fondacioni i KSNK-së”). Bordi i Standardeve Ndërkombëtare të Kontabilitetit (shkurt, “BSNK”), struktura dhe funksionet e të cilit jepen në seksionet 18-32, është organi i vendosjes së standardeve i Fondacionit të KSNK-së.
- 2 Objektivat e Fondacionit të KSNK-së janë:
 - (a) përgatitja, në interes të publikut, e një pakete të vetme standardesh botërore të kontabilitetit, të zbatueshëm dhe të kuptueshëm, të cilët të kërkojnë dhënien e informacionit të cilësisë së lartë, transparent dhe të krahasueshëm në pasqyrat financiare dhe në raportimin financiar, për të ndihmuar pjesëmarrësit në tregjet botërore të kapitaleve dhe përdoruesit e tjerë në marrjen e vendimeve ekonomike;
 - (b) nxitja e përdorimit dhe aplikimit rigoroz të këtyre standardeve;
 - (c) gjatë përmbushjes së objektivave që shoqërojnë pikat (a) dhe (b), marrja në konsideratë, sipas rastit, e nevojave speciale të njësive ekonomike të vogla dhe të mesme dhe të njësive ekonomike të reja; dhe
 - (d) realizimi i konvergencës së standardeve kombëtare të kontabilitetit dhe Standardeve Ndërkombëtare të Kontabilitetit dhe Standardeve Ndërkombëtare të Raportimit Financiar përmes zgjidhjeve të cilësisë së lartë.

Drejtimi i Fondacionit të KSNK-së

- 3 Drejtimi i Fondacionit të KSNK-së realizohet nga Administratorët e Besuar dhe nga organet e tjera drejtuese të cilat emërohen nga Administratorët e Besuar sipas dispozitave të këtij Statuti. Administratorët e Besuar duhet të bëjnë përpjekjet më të mira për të siguruar respektimin e kërkesave të këtij Statuti; Megjithatë, ata gëzojnë të drejtën të bëjnë ndryshime të vogla në interes të realizueshmërisë së ushtrimit të aktivitetit, nëse ndryshime të tilla marrin miratimin e 75% të gjithë Administratorëve të Besuar.

Administratorët e Besuar

- 4 Administratorët e Besuar janë njëzetedy individë.
- 5 Administratorët e Besuar janë përgjegjës për përzgjedhjen e të gjithë Administratorëve të Besuar të mëpasshëm, që do të plotësojnë vendet bosh të shkaktuar nga tërheqja rutinë prej kësaj detyre apo për arsye të tjera. Gjatë kësaj përzgjedhjeje, Administratorët e Besuar mbështeten në kriteret e parashikuara në Seksionet 6 dhe 7 dhe, në veçanti, kryejnë konsultime reciproke me organizata ndërkombëtare sikurse parashikohet në Seksionin 7, me qëllim përzgjedhjen e një personi me kualifikime të ngjashme me atë të Administratorit të Besuar që largohet, kur ky Administrator i Besuar që largohet është përzgjedhur përmes një procesi konsultimi reciprok me një ose më shumë organizata.
- 6 Të gjithë Administratorëve të Besuar u kërkohet të tregojnë një angazhim të vendosur ndaj Fondacionit të KSNK-së dhe BSNK-së si një organ i vendosjes së standardeve botërore të cilësisë së lartë, të kenë njohuri financiare dhe të kenë mundësinë për të përmbushur angazhimin kohor. Secili Administrator i Besuar duhet të

- ketë njohuri dhe të jetë i ndjeshëm për sfidat që shoqërojnë miratimin dhe aplikimin e standardeve botërore të kontabilitetit të cilësisë së lartë, i hartuar për t'u përdorur në tregjet kapitale të botës dhe nga përdorues të tjerë. Ndërhurja e Administratorëve të Besuar duhet të pasqyrojë sa më gjerë tregjet e kapitalit në botë dhe një shumëllojshmëri prejardhjesh gjeografike dhe profesionale. Administratorëve të Besuar u kërkohet të angazhohen zyrtarisht për të vepruar në interesin publik në të gjitha çështjet. Për të siguruar një bazë të gjerë ndërkombëtare, duhet të ketë
- (a) gjashtë Administratorë të Besuar të emëruar nga Amerika e Veriut;
 - (b) gjashtë Administratorë të Besuar të emëruar nga Evropa;
 - (c) gjashtë Administratorë të Besuar të emëruar nga rajoni i Azisë dhe Oqeanisë; dhe
 - (d) katër Administratorë të Besuar të emëruar nga çfarëdo treve gjeografike, në varësi të vendosjes së një drejtpeshimi të përgjithshëm gjeografik.
- 7 Administratorët e Besuar duhet të jenë persona të cilët, si grup, sigurojnë drejtpeshimin e duhur të sfoneve profesionale, ku përfshihen auditues, përpilues, përdorues, akademikë dhe zyrtarë të tjerë të cilët i shërbejnë interesit publik. Dy prej Administratorëve të Besuar duhet të jenë, normalisht, partnerë të lartë të firmave kontabël ndërkombëtare të njohura. Për të arritur këtë drejtpeshim, Administratorët e Besuar duhet të zgjidhen pas konsultimeve me organizatat kombëtare dhe ndërkombëtare të Audituesve (përfshirë Federatën Ndërkombëtare të Kontabilistëve), hartuesve, përdoruesve dhe akademikëve. Administratorët e Besuar vendosin procedurat për të kërkuar sugjerime për emërimet nga këto organizata dhe për t'u dhënë mundësi individëve të propozojnë emrat e tyre, ku përfshihet edhe njoftimi i vendeve të lira.
- 8 Normalisht, Administratorët e Besuar emërohen për një mandat prej tre vjetësh, i cili mund të ripërtërihet vetëm një herë. Për të siguruar vijimësi, disa prej Administratorëve të Besuar të parë do të shërbejnë me mandate që nuk përputhen në kohë, në mënyrë që të largohen nga detyra pas katër ose pesë vjetësh.
- 9 Në varësi të kërkesave të votimit të Seksionit 14, Administratorët e Besuar mund t'ia heqin mandatin si Administrator i Besuar një individ për arsye të performancës së dobët, sjelljes së keqe ose paaftësisë.
- 10 Kryetari i Administratorëve të Besuar caktohet njëri prej Administratorëve të Besuar nga vetë ata. Me miratimin e Administratorëve të Besuar, pavarësisht nëse ka shërbyer më parë si Administrator i Besuar apo jo, personi i emëruar mund të shërbejë si Kryetar me një mandat trevjeçar, i cili mund të ripërtërihet një herë, duke filluar nga data e emërimit si Kryetar.
- 11 Administratorët e Besuar mblidhen të paktën dy herë në vit dhe shpërblehen nga Fondacioni i KSNK-së me një honorar vjetor dhe një honorar për mbledhje, në përpjesëtim me përgjegjësitë e mara përsipër, ndërsa honorarët përcaktohen nga Administratorët e Besuar. Shpenzimet e udhëtimit për arsye pune të Fondacionit të KSNK-së mbulohen nga Fondacioni i KSNK-së.
- 12 Krahas kompetencave dhe detyrave të parashikuara në Seksionin 13, Administratorët e Besuar mund të marrin angazhime operative dhe masa të tjera si ta konsiderojnë të nevojshme për të arritur objektivat e organizatës, ku përfshihet, pa u kufizuar, marrja me qira e mjediseve dhe lidhja e kontratave të punës me anëtarët e BSNK-së.
- 13 Administratorët e Besuar:
- (a) marrin përgjegjësinë për vendosjen dhe ruajtjen e masave të duhura të financimit;
 - (b) vendosin ose ndryshojnë procedurat e punës për Administratorët e Besuar;
 - (c) përcaktojnë subjektin juridik nën të cilin ushtron aktivitetin Fondacioni i KSNK-së, me kusht që ky subjekt juridik të jetë gjithmonë një Fondacion ose organizëm tjetër që u parashikon përgjegjësi të kufizuar për anëtarët e vet dhe që dokumentet ligjore themeluese të këtij subjekti juridik të kenë dispozita për të arritur të njëjtat kërkesa me dispozitat e këtij Statuti.
 - (d) rishikojnë në kohën e duhur vendndodhjen e Fondacionit të KSNK-së, si për sa i takon bazës ligjore tij ashtu edhe se ku e ushtron aktivitetin;
 - (e) shikojnë mundësinë e marrjes së statusit të bamirësisë ose të një statusi të ngjashëm për Fondacionin e KSNK-së në ato shtete ku një status i tillë do të ndihmonte në marrjen e fondeve;
 - (f) i hapin takimet e tyre për publikun por, në bazë të vendimit të tyre, mund të mbajnë diskutime të caktuara (normalisht për përzgjedhjen, emërimin dhe çështje të tjera të personelit, dhe për financimin) në seanca të mbyllura. dhe
 - (g) publikojnë një raport vjetor për aktivitetet e Fondacionit të KSNK-së, ku përfshihen edhe pasqyrat financiare të audituara dhe prioritetet për vitin e ardhshëm.
- 14 Konsiderohet se ka kuorum për takimet e Administratorëve të Besuar nëse janë të pranishëm 60% e Administratorëve të Besuar, personalisht ose përmes mjeteve të telekomunikimit: Administratorët e Besuar nuk mund të përfaqësohen nga persona të tjerë apo mënyra të tjera. Secili Administrator i Besuar ka të drejtën e një vote dhe kërkohet shumicë e thjeshtë në rastet e votimit për të marrë vendime për çështje që nuk përfshijnë

heqjen e mandatit të një Administratori të Besuar, shtesat dhe ndryshimet në Statut apo ndryshime të vogla në interes të realizueshmërisë së operacioneve, në të cilat kërkohet një shumicë prej 75% e të gjithë Administratorëve të Besuar; nuk lejohet votimi me prokurë për asnjë çështje. Nëse votimi del në barazim, Kryetari ka të drejtën e hedhjes së një vote shtesë.

Pjesa B

Administratorët e Besuar

- 15 Krahës detyrave të parashikuara në Pjesën A, Administratorët e Besuar:
- (a) emërojnë anëtarët e BSNK-së dhe lidhin kontratat e shërbimit të tyre dhe vendosin kriteret e performancës për ta;
 - (b) emërojnë anëtarët e Komitetit Ndërkombëtar të Interpretimeve për Raportimin Financiar dhe të Bordit Këshillimor për Standardet;
 - (c) rishikojnë çdo vit strategjinë e Fondacionit të KSNK-së dhe të BSNK-së dhe efektivitetin e saj, ku përfshihet edhe marrja në shqyrtim, por jo caktimi, i programit të BSNK-së;
 - (d) aprovojnë çdo vit buxhetin e Fondacionit të KSNK-së dhe caktojnë bazën për financimin;
 - (e) shqyrtojnë çështjet e gjera strategjike të cilat prekin standardet e kontabilitetit, promovojnë Fondacionin e KSNK-së dhe punën e tij dhe promovojnë objektivin e aplikimit rigoroz të Standardeve Ndërkombëtare të Kontabilitetit dhe të Standardeve Ndërkombëtare të Raportimit Financiar, me kusht që Administratorët e Besuar të mos përfshihen në çështjet teknike që kanë të bëjnë me standardet e kontabilitetit;
 - (f) vendosin dhe ndryshojnë procedurat e punës, masat konsultative dhe procesin e rregullt për BSNK-në, Komitetin Ndërkombëtar të Interpretimeve për Raportimin Financiar dhe Bordin Këshillimor për Standardet;
 - (g) shqyrtojnë përmbushjen e procedurave të punës, masave konsultative dhe procesin e rregullt që përshkruhen në pikën (f);
 - (h) aprovojnë shtesat dhe ndryshimet në këtë Statut pas ndjekjes së një procesi të rregullt, ku përfshihet konsultimi me Bordin Këshillimor për Standardet dhe publikimi i një projekt-paraqitjeje për të marrë komente nga publiku, në varësi të kërkesave të votimit të parashikuara në Seksionin 14;
 - (i) ushtrojnë të gjitha kompetencat e Fondacionit të KSNK-së me përjashtim të atyre kompetencave të cilat, shprehimisht, i rezervohen BSNK-së, Komitetit Ndërkombëtar të Interpretimeve për Raportimin Financiar dhe Bordit Këshillimor për Standardet; dhe
 - (j) nxisin dhe shqyrtojnë përgatitjen e programeve dhe materialeve edukative të cilat përputhen me objektivat e Fondacionit të KSNK-së.
- 16 Administratorët e Besuar mund t'ia heqin mandatin një anëtarë të BSNK-së, të Komitetit Ndërkombëtar të Interpretimeve për Raportimin Financiar apo të Bordit Këshillimor për Standardet, për arsye të performancës së dobët, sjelljes së keqe ose mos përmbushjes së kërkesave të kontratës, dhe procedurat për heqjen e mandatit i hartojnë Administratorët e Besuar.
- 17 Llogaridhënia e Administratorëve të Besuar, ndër të tjera, sigurohet përmes:
- (a) angazhimit të marrë nga çdo Administrator i Besuar për të vepruar në interes të publikut;
 - (b) kryerjes nga ana e tyre e një shqyrtimi të gjithë strukturës së Fondacionit të KSNK-së dhe të efektivitetit të tij, ku një shqyrtim i tillë përfshin marrjen në shqyrtim të ndryshimit të kontributit gjeografik të Administratorëve të Besuar në përgjigje të ndryshimit të kushteve ekonomike globale, duke i publikuar propozimet e këtij shqyrtimi për komente nga publiku, ku shqyrtimi fillon tre vjet pas hyrjes në fuqi të këtij Statuti, me objektiv zbatimin e ndryshimeve të rëna dakort pesë vjet pas hyrjes në fuqi të këtij Statuti (6 shkurt 2006, pesë vjet pas datës së regjistrimit të Fondacionit të KSNK-së); dhe
 - (c) kryerjes nga ana e tyre e një shqyrtimi të ngjashëm, më pas, çdo pesë vjet.

BSNK

- 18 BSNK përbëhet nga katërmëdhjetë anëtarë, të emëruar nga Administratorët e Besuar në bazë të Seksionit 15(a), nga të cilët dymbëdhjetë janë anëtarë me kohë të plotë ("me kohë të plotë" do të thotë që anëtarët në fjalë do ta angazhojnë të gjithë kohën e tyre në formën e marrëdhënieve të punës me pagesë me Fondacionin e KSNK-së). Dy anëtarët e tjerë janë anëtarë me kohë të pjesshme ("me kohë të pjesshme" do të thotë që anëtarët në fjalë do t'ia angazhojnë pjesën më të madhe të kohës së tyre në formën e marrëdhënieve të punës me pagesë me Fondacionin e KSNK-së) dhe përmbushin udhëzimet për pavarësinë, të dhëna nga Administratorët e Besuar. Punës së BSNK-së nuk i humbet vlefshmëria për shkak të pamundësisë për të pasur gjithmonë plotësimin e

- numrit të anëtarëve me katërmbëdhjetë syresh, edhe pse Administratorët e Besuar duhet të bëjnë përpjekjet e tyre më të mira për të arritur plotësimin e numrit të anëtarëve.
- 19 Kushtet kryesore për t'u anëtarësuar në BSNK janë aftësia profesionale dhe përvoja praktike. Administratorët e Besuar i përzgjedhin anëtarët e BSNK-së në mënyrë të atillë që të përbëjnë një grup personash që përfaqësojnë, brenda atij grupi, ndërthurjen më të mirë të mundshme të njohurive teknike dhe shumëllojshmërisë së përvojës së biznesit dhe tregjeve ndërkombëtare, për të dhënë kontributin në përgatitjen e standardeve globale të kontabilitetit të një cilësie të lartë. Një person nuk mund të jetë njëkohësisht Administrator i Besuar dhe anëtar i BSNK-së.
- 20 Përzgjedhja e anëtarëve BSNK-së nuk mbështetet në kriteret gjeografike, por Administratorët e Besuar duhet të kujdesen që BSNK-ja të mos dominohen nga asnjë organizatë e veçantë apo interes gjeografik. Në veçanti, Administratorët e Besuar duhet të respektojnë parametrat e përgjithshëm të parashikuar në Kriteret për Anëtarët e BSNK-së, që i bashkëlidhen këtij Statuti.
- 21 Administratorët e Besuar i përzgjedhin anëtarët e BSNK-së në mënyrë të atillë që BSNK-ja, si grup, të ofrojë kombinimin më të mirë të përvojës më të fundit praktike të audituesve, hartuesve, përdoruesve dhe akademikëve.
- 22 Në konsultim me Administratorët e Besuar, BSNK pritet të vendosë dhe ruajë lidhjet me organet kombëtare të vendosjes së standardeve dhe me organe të tjera zyrtare që kanë të bëjnë me vendosjen e standardeve në mënyrë që të nxitet konvergjenca e standardeve kombëtare me Standardet Ndërkombëtare të Kontabilitetit dhe Standardet Ndërkombëtare të Raportimit Financiar.
- 23 Çdo anëtar me kohë të plotë dhe me kohë të pjesshme i BSNK-së bie dakort me kontratë për të vepruar në interesin publik dhe për të pasur në konsideratë Kuadrin e BSNK-së (me shtesat dhe ndryshimet e bëra herë pas here) gjatë vendosjes dhe rishikimit të standardeve.
- 24 Administratorët e Besuar emërojnë njërin prej anëtarëve me kohë të plotë si Kryetar të BSNK-së, që do të jetë edhe Drejtori Ekzekutiv i Fondacionit të KSNK-së. Njëri prej anëtarëve me kohë të plotë të BSNK-së caktohet nga Administratorët e Besuar si Nën-Kryetar, roli i të cilit është të kryesojë mbledhjet e BSNK-së në mungesë të Kryetarit në rrethana të jashtëzakonshme (siç është sëmundja). Emërimi i Kryetarit dhe caktimi si Nën-Kryetar bëhet për një mandat të cilin e vendosin Administratorët e Besuar. Titulli i Nën-Kryetarit nuk nënkupton që personi në fjalë është Kryetar i ardhshëm.
- 25 Anëtarët e BSNK-së emërohen për një mandat deri në pesë vjet, i cili mund të rinovohet një herë. Administratorët e Besuar hartojnë rregullat dhe procedurat për të siguruar që BSNK është dhe shihet se është i pavarur dhe, në veçanti, pas emërimit të tyre, anëtarët me kohë të plotë të BSNK-së t'i ndërpresin të gjitha marrëdhëniet e punës me punëdhënësit aktualë dhe të mos mbajnë asnjë post nga i cili marrin stimuj ekonomikë që mund të hedhin hije dyshimi mbi pavarësinë e gjykimit të tyre gjatë vendosjes së standardeve të kontabilitetit. Për rrjedhojë, nuk lejohet asnjë e drejtë për t'u rikthyer te punëdhënësit. Anëtarët me kohë të pjesshme të BSNK-së nuk priten t'i ndërpresin kontratat e tjera të punës.
- 26 Mandatet e emërimit të anëtarëve të BSNK-së vendosen në mënyrë çfazuara në kohë në mënyrë që jo të gjithë anëtarët të largohen nga BSNK-ja në të njëjtën kohë. Për ta përmbushur këtë, Administratorët e Besuar vendosin për mandate trevjeçare për disa anëtarë, katërvjeçare për disa të tjerë dhe mandate të plota pesëvjeçare për pjesën tjetër të valës së parë të anëtarëve.
- 27 Anëtarët me kohë të plotë dhe me kohë të pjesshme të BSNK-së shpërblehen me honorarë që janë në përpjesëtim me përgjegjësitë përkatëse të marra përsipër. Këta honorarë vendosen nga Administratorët e Besuar. Shpenzimet e udhëtimit për arsye pune të BSNK-së mbulohen nga Fondacioni i KSNK-së.
- 28 BSNK mbledhet sipas kohës dhe vendit që vendos vetë. Mbledhjet e BSNK-së janë të hapura për publikun por disa diskutime të caktuara (normalisht për përzgjedhjen, emërimin dhe çështje të tjera të personelit) mund të mbahen në seanca të mbyllura, në bazë të vendimit të vetë BSNK-së.
- 29 Secili anëtar i BSNK-së ka një votë. Votimi me prokurë nuk lejohet për çështjet teknike dhe as për çështje të tjera, dhe anëtarët e BSNK-së nuk kanë të drejtë të emërojnë përfaqësues për të marrë pjesë në takime. Nëse rezultati i votimit është pa alternativë fituese, për një vendim që duhet marrë me shumicë të thjeshtë të anëtarëve të BSNK-së të pranishëm në mbledhje personalisht ose përmes mjeteve të telekomunikimit, të drejtën e një vote shtesë e ka Kryetari.
- 30 Publikimi i një projekt-paraqitjeje, i një Standardi Ndërkombëtar të Kontabilitetit, i një Standardi Ndërkombëtar të Raportimit Financiar apo i Interpretimit përfundimtar nga Komiteti Ndërkombëtar i Interpretimeve për Raportimin Financiar kërkon aprovimin e nëntë nga katërmbëdhjetë anëtarët e BSNK-së. Vendimet e tjera të BSNK-së, përfshirë edhe publikimin e një materiali për diskutim, kërkon shumicë të thjeshtë të anëtarëve të BSNK-së të pranishëm në mbledhje në të cilën marrin pjesë të paktën 60 përqind e anëtarëve të BSNK-së, personalisht ose përmes mjeteve të telekomunikimit.
- 31 BSNK:

- (a) ka përgjegjësinë e plotë për të gjitha çështjet teknike të BSNK-së, ku përfshihet edhe përgatitja dhe publikimi i Standardeve Ndërkombëtare të Kontabilitetit, i Standardeve Ndërkombëtare të Raportimit Financiar dhe i projekt-paraqitjeve, dokumente të cilët duhet të përfshijnë edhe opinionet kundërshtuese, nëse ka, dhe ka përgjegjësinë e plotë për aprovimin e interpretimeve të Komitetit Ndërkombëtar të Interpretimeve për Raportimin Financiar;
 - (b) publikon një projekt-paraqitje për të gjithë projektet dhe, normalisht, publikon një material për diskutim për të marrë komente nga publiku për projektet madhore;
 - (c) ka të drejtën e marrjes së vendimit për përgatitjen dhe ndjekjen e programit teknik të punës të BSNK-së dhe për detyrat e projekteve për çështjet teknike; gjatë organizimit të punës së vet, BSNK mund të kontraktojë realizimin e punës kërkimore dhe punëve të tjera me organet kombëtare të vendosjes së standardeve dhe organizata të tjera;
 - (d)
 - (i) vendos procedurat për shqyrtimin e komenteve të bëra brenda një periudhe të arsyeshme për dokumentet e publikuara për komente,
 - (ii) normalisht formon grupet e punës ose llojet e tjera të grupeve këshillimore të specializuara për të dhënë këshilla për projektet madhore;
 - (iii) konsultohet me Bordin Këshillimor për Standardet për projektet madhore, vendimet për programin dhe prioritetet e punës, dhe
 - (iv) normalisht publikon bazat për konkluzionet me Standardet Ndërkombëtare të Kontabilitetit, Standardet Ndërkombëtare të Raportimit Financiar dhe Projekt-Paraqitjet;
 - (e) shqyrton idenë e mbajtjes së seancave të dëgjimit të publikut për të diskutuar për standardet e propozuara, edhe pse nuk ka një kërkesë ligjore për të mbajtur seanca të dëgjimit të publikut për çdo projekt;
 - (f) shqyrton kryerjen e testeve në terren (si në vendet e zhvilluara ashtu edhe në tregjet e sapolindura) për të siguruar që standardet e propozuara janë praktikë dhe të zbatueshëm në të gjithë mjediset, edhe pse nuk ka një kërkesë ligjore për të kryer teste në terren për çdo projekt; dhe
 - (g) jep arsyet nëse vendos të mos ndjekë ndonjërin prej procedurave të parashikuara në pikat (b), (d)(ii), d(iv), (e) dhe (f).
- 32 Teksti në fuqi i projekt-paraqitjeve, i Standardeve Ndërkombëtare të Kontabilitetit, i Standardeve Ndërkombëtare të Raportimit Financiar ose i projekt-interpretime apo i interpretimeve përfundimtare është ai i publikuar nga BSNK në gjuhën angleze. BSNK mund të publikojë përkthime të autorizuara ose t'u japë autorizimin të tjerëve për të publikuar përkthime të teksteve që kanë fuqi ligjore të projekt-paraqitjeve, Standardeve Ndërkombëtare të Kontabilitetit, Standardeve Ndërkombëtare të Raportimit Financiar dhe projekt-interpretimeve dhe interpretimeve përfundimtare.

Komiteti Ndërkombëtar i Interpretimeve për Raportimin Financiar

- 33 Komiteti Ndërkombëtar i Interpretimeve për raportimin Financiar përbëhet nga dymbëdhjetë anëtarë me të drejtë vote të emëruar nga Administratorët e Besuar sipas Seksionit 15(b) për mandate trevjeçare që mund të rinovohen. Administratorët e Besuar emërojnë një anëtar të BSNK-së, Drejtorin e Aktiviteteve Teknike ose një punonjës të nivelit të lartë të BSNK-së ose një person tjetër që plotëson kushtet e duhura, për të kryesuar Komitetin. Kryetari ka të drejtë të flasë për çështjet teknike të cilat po diskutohen, por nuk ka të drejtën e votimit. Administratorët e Besuar, kur e konsiderojnë të nevojshme, emërojnë si vëzhgues pa të drejtë vote përfaqësues të organizatave rregullatore, që kanë të drejtën të marrin pjesë dhe të flasin në takime. Shpenzimet e udhëtimit për arsye pune të Komitetit mbulohen nga Fondacioni i KSNK-së.
- 34 Komiteti mbledhet në mënyrën dhe kohën e kërkuar dhe kuorumi përbëhet nga nëntë anëtarë me të drejtë vote të pranishëm personalisht ose përmes mjeteve të telekomunikimit: një ose dy anëtarë të BSNK-së caktohen nga BSNK për të marrë pjesë në mbledhje si vëzhgues pa të drejtë vote; anëtarët e tjerë të BSNK-së mund të marrin pjesë dhe të flasin në mbledhje. Në raste të jashtëzakonshme, anëtarëve të Komitetit mund t'u lejohet të dërgojnë përfaqësues pa të drejtë vote, në varësi të vendimit të merr Kryetari i Komitetit. Anëtarët që duan të caktojnë një përfaqësues duhet të kërkojnë pëlqimin e Kryetarit përpara se të zhvillohet mbledhja në fjalë. Mbledhjet e Komitetit janë të hapura për publikun por disa diskutime të caktuara (normalisht për përzgjedhjen, emërimin dhe çështje të tjera të personelit) mund të mbahen në seanca të mbyllura, në bazë të vendimit të vetë Komitetit.
- 35 Secili anëtar i Komitetit ka një votë. Anëtarët votojnë sipas pikëpamjeve të tyre të pavarura, jo si përfaqësues të pikëpamjeve të firmave, organizatave apo organeve anëtare, në të cilat mund të bëjnë pjesë. Nuk lejohet votimi me prokurë. Miratimi i versioneve paraprake apo përfundimtare të interpretimeve kërkon që kundër vendimit të mos votojnë më shumë se tre anëtarë me të drejtë vote.

36 Komiteti:

- (a) interpreton aplikimin e Standardeve Ndërkombëtare të Kontabilitetit (SNK) dhe të Standardeve Ndërkombëtare të Raportimit Financiar (SNRF) dhe jep udhëzime në kohë për ato probleme të raportimit financiar që nuk trajtohen në mënyrë specifike në SNK ose SNRF, në kontekstin e Kuadrit të BSNK-së, dhe kryen detyra të tjera sipas kërkesës së BSNK-së;
- (b) gjatë realizimit të punës së vet sipas pikës (a), ka në konsideratë objektivin e BSNK-së për të punuar aktivisht me organet kombëtare të vendosjes së standardeve për të realizuar konvergencën e standardeve kombëtare të kontabilitetit me SNK-të dhe SNRF-të përmes zgjidhjeve të cilësisë së lartë;
- (c) publikon, pas marrjes së miratimit nga BSNK, projekt-interpretimet për komente nga publiku dhe merr në konsideratë komentet e bëra brenda një periudhe të arsyeshme përpara finalizimit të një Interpretimi; dhe
- (d) raporton përpara BSNK-së dhe merr aprovimin e tij për Interpretimet përfundimtare.

Bordi Këshillimor për Standardet

37 Bordi Këshillimor për Standardet, anëtarët e të cilit emërohen nga Administratorët e Besuar sipas Seksionit 15(b), ofron një forum ku të marrin pjesë organizata dhe individë, që kanë interes për raportimin financiar ndërkombëtar, nga sfonte të shumëllojshme gjeografike dhe funksionale, me objektivin:

- (a) për të këshilluar BSNK-në për vendimet në lidhje me programin e punës dhe prioritetet e punës së BSNK-së,
- (b) për ta informuar BSNK-në për pikëpamjet e organizatave dhe individëve në Bord në lidhje me projektet madhore për vendosjen e standardeve dhe
- (c) për t'u dhënë këshilla të tjera BSNK-së dhe Administratorëve të Besuar.

38 Bordi Këshillimor përbëhet nga tridhjetë ose më shumë anëtarë, nga sfonte të shumëllojshme gjeografike dhe profesionale, të emëruar me mandate trevjeçare që mund të rinovohen. Kryetari i Bordit Këshillimor emërohet nga Administratorët e Besuar dhe ai nuk mund të jetë anëtar ose punonjës i BSNK-së. Administratorët e Besuar e ftojnë Kryetarin e Bordit Këshillimor të marrë pjesë në takimet e Administratorëve të Besuar, kur ta shohin të përshtatshme.

39 Zakonisht, Bordi Këshillimor mbledhet të paktën tri herë në vit. Mbledhjet janë të hapura për publikun. BSNK konsultohet paraprakisht me Bordin Këshillimor për vendimet e BSNK-së për projektet madhore; Administratorët e Besuar konsultohen paraprakisht me Bordin Këshillimor në lidhje me ndryshimet e propozuara ndaj këtij Statuti.

Drejtori ekzekutiv dhe stafi

40 Siç parashikohet nga Seksioni 24, Kryetari i BSNK-së është edhe Drejtori Ekzekutiv i Fondacionit të KSNK-së, nën mbikëqyrjen e Administratorëve të Besuar.

41 Drejtori Ekzekutiv është përgjegjës për pajisjen me staf të BSNK-së, që përfshin edhe një Drejtor të Aktiviteteve Teknike të emëruar nga Drejtori Ekzekutiv pas konsultimeve me Administratorët e Besuar. Drejtori i Aktiviteteve Teknike, edhe pse nuk është anëtar i BSNK-së, ka të drejtën të marrë pjesë në debat por pa të drejtë vote, në mbledhjet e BSNK-së dhe të Komitetit Ndërkombëtar të Interpretimeve për Raportimin Financiar.

42 Duhet të emërohen nga Drejtori Ekzekutiv edhe një Drejtor i Operacioneve dhe një Drejtor Komercial, pas konsultimeve me Administratorët e Besuar. Ata kanë përgjegjësinë për publikimet dhe të drejtat e autorit, komunikimin, administratën dhe financat, nën mbikëqyrjen e Drejtorit Ekzekutiv dhe për gjetjen e fondeve nën mbikëqyrjen e Administratorëve të Besuar.

Administrata

43 Zyra administrative e Fondacionit të KSNK-së duhet të vendoset në vendndodhjen e vendosur nga Administratorët e Besuar në përputhje me Seksionin 13(d).

44 Fondacioni i KSNK-së është subjekt juridik sipas vendimit të Administratorëve të Besuar dhe rregullohet me këtë Statut dhe ligjet të cilat zbatohen për këtë lloj subjekti juridik, ku përfshihen, sipas rastit, ligjet e zbatueshme në vendin ku ndodhet selia e regjistruar.

45 Detyrimin ligjor për Fondacionin e KSNK-së e mbart nënshkrimi ose nënshkrimet e personit ose personave të autorizuar rregullisht nga Administratorët e Besuar.

Aneks

Kriteret e Fondacionit të Komitetit të Standardeve Ndërkombëtare të Kontabilitetit për Anëtarët e BSNK-së

Pikat e mëposhtme përfaqësojnë kriteret për anëtarët e BSNK-së:

- 1 **Kompetencë dhe dije teknike e demonstruar në lidhje me kontabilitetin dhe raportimin financiar.** Të gjithë anëtarët e BSNK-së, pavarësisht faktit nëse janë apo jo profesionistë të kontabilitetit, hartues, përdorues apo akademikë, duhet të kenë treguar një nivel të lartë dijeje dhe kompetence teknike në lidhje me kontabilitetin dhe raportimin financiar. Besueshmëria e BSNK-së dhe anëtarëve të tij dhe efektiviteti dhe efienca e organizimit rritet nëse ky Bord ka anëtarë me sa më shumë njohuri dhe aftësi.
- 2 **Aftësia për të analizuar.** Anëtarët e BSNK-së duhet të kenë treguar aftësi për të analizuar problemet dhe për të marrë në konsideratë rrjedhojat e kësaj analize për procesin e marrjes së vendimeve.
- 3 **Aftësitë e komunikimit.** Janë të nevojshme aftësitë për një komunikim të efektshëm me gojë dhe me shkrim. Këtu përfshihet aftësia për të komunikuar në mënyrë të efektshme në mbledhjet e mbyllura me anëtarët e BSNK-së, në mbledhjet e hapura dhe në materialet me shkrim siç janë standardet e kontabilitetit, fjalimet, artikujt, letrat e brendshme dhe korrespondenca me organet anëtare. Në aftësitë e komunikimit përfshihet edhe aftësia për të dëgjuar dhe për të marrë në konsideratë mendimet e të tjerëve. Edhe pse është e nevojshme njohuria gjuhës angleze për arsye pune, gjatë përzgjedhjes nuk duhet të bëhet asnjë diskriminim në bazë të faktit nëse anglishtja është gjuhë e parë apo jo.
- 4 **Marrja e vendimeve në mënyrë të drejtë.** Anëtarët e BSNK-së duhet të jenë në gjendje të marrin në konsideratë pikëpamje të ndryshme, të peshojnë informacionin e paraqitur në mënyrë të paanshme dhe të arrijnë në kohën e duhur në vendime të arsyetura mirë dhe të mbështetura.
- 5 **Ndërgjegjësimi për mjedisin e raportimit financiar.** Raportimi financiar i cilësisë së lartë është nën ndikimin e mjedisit të financave, biznesit dhe ekonomisë. Anëtarët e BSNK-së duhet të kenë njohuri për mjedisin ekonomik global në të cilin ushtron aktivitet BSNK. Ky ndërgjegjësim global duhet të përfshijë edhe ndërgjegjësimin për çështjet e biznesit dhe të raportimit financiar të cilat kanë lidhje dhe prekin cilësinë e raportimit financiar transparent dhe dhënien e informacioneve financiare në tregje të ndryshme të kapitaleve në mbarë botën, ku përfshihen edhe ata që përdorin Standardet Ndërkombëtare të Raportimit Financiar.
- 6 **Aftësia për të punuar në një atmosferë kolegjiale.** Anëtarët duhet të jenë në gjendje të tregojnë respekt, takt dhe konsideratë për mendimet e njëri tjetrit dhe të organizatave anëtare. Anëtarët duhet të jenë në gjendje të punojnë me njëri tjetrin për të arritur pikëpamje me konsensus të bazuara në objektivin e BSNK-së për zhvillimin e një raporti financiar të cilësisë së lartë dhe transparent. Anëtarët duhet të jenë në gjendje ta vendosin objektivin e BSNK-së mbi filozofitë dhe interesat individuale.
- 7 **Ndershmëria, objektiviteti dhe disiplina.** Besueshmëria e anëtarëve duhet të tregohet përmes ndershmërisë dhe objektivitetit të tyre. Këtu përfshihet si ndershmëria intelektuale ashtu edhe ndershmëria në marrëdhëniet me anëtarët e tjerë të BSNK-së dhe organizatat anëtare. Anëtarët duhet të tregojnë aftësinë për të qenë objektivë në arritjen e vendimeve. Anëtarët duhet të tregojnë edhe aftësinë për disiplinë rigoroze dhe përballimin e ngarkesës së punës.
- 8 **Angazhimi ndaj misionit të Fondacionit të KSNK-së dhe interesit publik.** Anëtarët duhet të angazhohen për arritjen e objektivit të Fondacionit të KSNK-së për vendosjen e standardeve ndërkombëtarë të kontabilitetit dhe të raportimit financiar të cilët të jenë të cilësisë së lartë, të krahueshëm dhe transparentë. Kandidati për anëtar i BSNK-së duhet të jetë i angazhuar edhe për t'i shërbyer interesit publik përmes një procesi privat të vendosjes së standardeve.

